

2 Timoteo

¹ Høøch hädaa nocy nhädiuumby, høøch Pablohajpä. Ja'a Jesucristøch jaduhñ xquiuguexyhajp. Ja'a Dios jaduhñ mänaamb cooçh jaduhñ xquiuguexyhädät. Coö ja'a Jesucristo hajxy xmiøødhájtäm tu'ugjoot tu'ugwiinmahñdy, paadiä Dios hajxy tøø xyajwiinwaanøøyyäm coö hajxy cøjxta'axiøø xyagjugyhadäänäm neby je'e jiugyhatiän.

² Miich Timoteo, miichhøch hädaa nocy nyajnäjaayøøby. Jadúhñhøch miich ndsocy nébiøch nhamdsoo huungän. Ween miichä Diosteedy mayhajt xtiuunä møødä Wiindsón Jesucristo. Weenä nñäxuuçh. Weenä hoyhajtä weenhajt xmiø'oy.

³ Hojiot howyiinmahñdymøødhøchä Dios nwiingudsähgø'oy nébiøchä nhap nébiøchä ndeedyhajxy jecy wyiingudsähgøøyyän. Hoy ñaaghóoc-høchä Dios nba'ya'axy, mänitøch miich njahmiejtsta'agy. Mänitøchä Dios jaduhñ nnäma'ay “Dioscujú'uyäp” ja'a miichcøxpä.

⁴ Nja wi'i yhijtägatsáambiøch miich, jadúhñhøch nxoonäacpøgät. Xøømdsúhmhøch miich njahmiejtsta'agy. Njahmiéjchpøch jaduhñ coö miich hánajty mjaançh tehñ jiootmayhaty mänaa hajxy jim nniwiá'xäm.

⁵ Jadúhñhøch njahmiejtspä coö miichä Diosmädia'agy hamuumdu'joot mmäbøcy. Ja'a mdajhoc Loida møødä mdaj Eunice, jaaya'ayä

Diosmädia'agy hajxy jayøjp mæbøjtsohn. Tøyhajt jaduhñ coo miich jaduhñ mbamæbøjpä.

⁶ Mänäajøch miich jim ngø'ønähgapiän, mänit miichä Dios mayhajt xtiuunä. Jaduhñ miich mäjaa xmiooyy coo ja'a tiuung mdúunät. Cham nnäma'ay coo mga'a najtshixó'øwät ja'a mayhajt ja'a Dios mänit xtiuunäbä, pero ween hamuumdu'joot mjaac yajtuñ.

⁷ Hix, jaduhñä Dios hajxy xyajmädsójcäm coo hajxy nga'a tsähgøøyyämät. Jaduhñ hajxy xyajmädsójcämbä coo hajxy ndúunämät ja'a miäjaahaam, møød coo hajxy hamiñ haxøpy nniçhojc nnibia'häyóowämät, møød coo hojiot howyiinmahñdy hajxy nyajtuunämät.

⁸ Jaduhñds je'e, cab mdsähdiúnät ja'a Dioscøxpä coo ja'a miädia'agy hänäjty myajwá'xä. Ni jaduhñ mga'a tsähdiúumbät ja'a høøchcøxpä, hóyhøch yaa nja tsumyçhänä'ay. Páadyhøch yaa ndsumyçhänä'ay coochä Dios ja'a miädia'agy nyajwá'xäbä. Cab mdsähgø'øwät coo mdsaaçhpøgät ja'a Diosmädia'agyquiøxpä nébiøch ndsaaçhpøquiän høøch. Hix, xpiuhbédäbä Dios jaduhñ ja'a miäjaahaam.

⁹ Ja'a Dios hajxy tøø xyajnähwaats tøø xyajcuhwáatsäm. Jaaya'ay hajxy tøø xpiädáacäm coo ja'a miädia'agy hajxy hoy ngudiúunämät. Paadiä Dios hajxy jaduhñ xyajnähwaats xyajcuhwáatsäm coo hajxy xchójcäm, møød coo mayhajt hajxy jecy xtiuunäm ja'a Jesucristocøxpä; ca'a jie'eguiøxpä cooc tyijy hajxy hoy nguhdujthájtäm. Cahnä hädaa yaabä naaxwiin hänäjty yhawijy tiøø'xta'agy, tøøyyämä

Dios ja'a mayhajt hajxy hānajtj jaduhñ xtiúunām.

10 Coo ja'a Jesucristo hajxy yaa hoy tøø xyajñähwaats tøø xyajcuhwáatsām, jaduhñä Dios ja'a mayhajt yajwiingähxø'nä, ja'a hajxy jecy xtiúunāmbä. Coo ja'a Jesucristo hajxy yaa hoy tøø xñähho'túutām, jaduhñ quiähxø'øgy coo hajxy cøjxta'axiøø xyagjugyhadáañäm neby je'e jiugyhatiän. Jaduhñ jiiby myiñ cujaay maa ja'a Diosmädia'aguiän.

11 Páadyhøchä Jesucristo jaduhñ xquiuguexyhaty coochä Diosmädia'agy jaduhñ nyajwá'xät coo jaaya'ay hajxy jaduhñ tøø xyajñähwaats tøø xyajcuhwáatsām.

12 Cooch jaduhñ nyajwa'xy, páadyhøch jaduhñ ndsaaçhpøcy. Pero cábøch ndsähdiuñ. Hix, coochä Dios ja'a miädia'agy jaduhñ nmäbøjcä cooch jaduhñ xyajñähwa'adsa'añ, páadyhøchä tøyhajt nmøødä coo jaduhñ hoy cwieendähada'añ pønjätyhøch tøø xyajcø'ødägø'øy. Paady jaduhñ cwieendähada'añ coo ja'a Jesucristo yaa quiädaactägatsa'añ hädaa yaabä naaxwiin.

13 Jaac panøcx ja'a hoguiuhdujt, ja'açh miich tøø nyajñähixø'øyäbä. Coo ja'a Jesucristo hajxy nmøødhíjtäm tu'ugjoot tu'ugwiinmahñdy, paadiä miädia'agy hamuumdu'joot mmäbøjcät, paadiä jäya'ay hamuumdu'joot mdsoc mba'häyówät, ja'a miich myajñähixøøbiä.

14 Hamuumdu'jootä tøyhajt myajwá'xät, ja'a Dios tøø xyajcø'ødägø'øyäbä. Caj myajtägátsät. Coo ja'a Dioshespíritu hajxy nmøødhíjtäm, paady miich jaduhñ xpiuhbeda'añ.

15 Tøø miichäda'a mmädoyhaty coochä

mäbøjpädøjc nämay tøø xpiuhwaatsnä, ja'a hajxy jim tsohm̄bä Asia-naaxooty, näguipxy møødä Figelo møødä Hermógenes.

16-18 Pero cábøchä Onesíforo mäbøcy tøø xmiädsähdiuñ, hóyhøch yaa nja tsumyčhänä'ay. Weenä Dios ja'a Onesíforo ja'a yhuungä tio'oxy ñäxuu'tsä. Coö miejch Roma, mänitøch nägø'ø nädecypiä xyhøxtaayy. Y coöch yaa xpiaaty, mänitøch mayhooc xpiuhbejty. Y hamuumdu'joot hajxy jim xpiuhbétäm Efeso, túhmäts. Coö yhabáadät coö ja'a Dios hajxy hánajty xyajtøyhajtyegáañäm, weenä Dios ja'a Onesíforo mänit ñäxuučh.

2

¹ Huung Timoteo, weenä Jesucristo xpiuhbety, jaduñ mga'a tsähgø'øwät mänaa. Coö ja'a Jesucristo hajxy jaduñ nmøødhjítäm tu'ugjoot tu'ugwiinmahñdy, paadiä mayhajt hajxy jaduñ xtiúunäm.

² Mänáajøch miichä Diosmädia'agy nyajwi-ingapxø'øyän, nämayyä jäya'ayhajxy hánajty miämädoona'ay. Jaduñ miich wiinghana'c mnajtscapxøødiägájsät, ja'a hajxy hoy cudiuumbä, ween wiinghänä'c hajxy jiaac tehñ ñajtscapxøødiägájsägumbä.

³ Ja'a Jesucristocøxpä mmee'xtúgät coö hánajty mdsaačhpøcy, nebiä soldadohajxy miee'xtuquiän.

⁴ Hix, ja'a soldadohajxiä, jaduñä jioot hajxy piäda'agy coö hajxy ween quiumayii ja'a wyi-indsøñhajxy. Cab jaduñ yhahixø'øy coö wiing-tuung hajxy yhøxtá'awät.

⁵ Jaaná jaduh_nduh_mbä, ja'a häyø'pädøjc-hajxiä, coo hajxy jaduh_n hoy yhäyø'øgät nebiä cuhdujt myiñän, mänit hajxy hawiinmats quiuhäyø'øgät. Pero coo hajxy quia'a häyø'øgät, cab hajxy tii piáadät.

⁶ Jaaná jaduh_nduh_mbä, ja'a yuubä pujxpähajxy hoy cuduumbä, je'edshajxy jaduh_n jawyiin májúuyyáp.

⁷ Yajcopcø'øw hoy nébiøch cham nmäna'añ, weenä Dios jaduh_n xquiøxy yajwiinjuø'øy.

⁸ Ja'a Jesucristo, ja'a David jecy yhaphajt yhoc-hajt. Coo ja'a Jesucristo hänäjty tøø yho'ogy, mänit jiuypiojtägajch. Ja'a Jesucristocøxpøch nnä'ägädä yajwiingapxø'øyhaty.

⁹ Coočhä Jesucristocøxpä jaduh_n nyajnähixø'øy, páadyhøch yaa ndsaačhpøcy. Páadyhøch yaa ndsumyčhäna'ay nebiä cahwiindøybän. Pero cabä Diosmädia'agy jaduh_n mänaa yhadugyii. Wiinduhmyhagajpt jaduh_n wia'xy.

¹⁰ Coo jaduh_n hoy miaajä wia'xy, páadyhøch yaa hoy ñejpiä nmee'xtucy, weenä jäya'ayhajxy jaduh_n ñähwaats quiuhwaatspä, ja'a Dios jaduh_n tøø yajnähdíjjiäbä coo ja'a Jesucristo hajxy miøødhídät tu'ugjoot tu'ugwiinmahñdy, møød ween hajxy yagjugyhadyii cøjxta'axiøø nebiä Dios jiu gyhatiän.

¹¹ Hix, coo hajxy nniñähdújcämät coo hajxy nhó'cämät nebiä Jesucristo yho'quiän, mänit hajxy jaduh_n njugyhájtämät cøjxta'axiøø nebiä Jesucristo jiu gyhatiän. Møød jaduh_n hajxy jim nhidáañäm maa je'e yhitiän. Tehm tiøyhajt jaduh_n.

¹² Jaaná jaduh_nduh_mbä, coo hajxy

nnee'xtújcämät, mänitä Jesucristo hajxy jim xmiøødhanéhämät. Pero coo hajxy nnijjögápxämät cooc tyijy hajxy nga'a hixyhájtám, cab hajxy jim xyajtägøøyyämät maa je'e yhiñän.

¹³ Hoy hajxy nja høhnda'agy. Hoy miänaajä tiømiädia'agyhaty.

¹⁴ Myagjahmiejtstá'agäbä mæbøjpädøjc jaduhñ nébiøch naamnä tøø ngujaayän. Hoorä, jaduhñ myajwiingapxø'øwät coo ja'a capxiä mädia'agy hajxy quia'a yajtsibø'øwät, ja'a ca'a tsoobaatpä. Jaduhñä Dios hajxy xyhanéhäm. Cab jaduhñ tiuunngaady coo hajxy jaduhñ yajtsibø'øy. Ja'a jäya'ayhajxy jaduhñ hamädoowhijpä, cabä hoguiapxiä homiädia'agy hajxy jaduhñ hoy yhabøga'añ.

¹⁵ Hamuumdu'jootä tøyhajt myajnähixø'øwät ja'a Jesucristocøxpä, jaduhñä Dios xquiumáyät, jaduhñ mga'a tsähdiúnät.

¹⁶ Cabä capxiä mädia'agy myajcapxiø'øwät, ja'a ca'a tsoobaatpä. Ja'a jäya'ayhajxy jaduhñ tehngajnä yajcapxiøøbiä, tehngajnä hajxy jaduhñ nøcxy tiu'udägoyya'añ.

¹⁷ Y maas nämayyä jäya'ayhajxy jaduhñ tiu'udägoyya'añ coo ja'a capxiä mädia'agy hajxy jaduhñ miädówät, ja'a jaduhñ ca'a tsoobaatpä. Tøø ja'a Himeneo jaduhñ tiu'udägooñä møødä Fileto.

¹⁸ Tøø ja'a tøyhajt hajxy ñajtshixøøñä. Jaduhñ hajxy høhnda'agy cooc tyijy hajxy nga'a juypjøjtägatsaanäm. Ja'a mæbøjpädøjc-hajxy näje'e, coo hajxy jaduhñ wyiinhøøñii, cabä Diosmädia'agy hajxy jaduhñ hoy miäbøgaannä.

19 Pero tøø ja'a Dios hajxy xpiädáacäm coo ja'a miädia'agy hajxy tehngajnä nbanócxämät. Jaduhñä Dios tøø miäna'añ cooc ñajuø'øý pønä miädia'agy hamuumdu'joot mäbøjcäp. Jaduhñ tøø miänaambä coo ja'a haxøøgcuhdujt hajxy ween ñajtshixø'øý pønjatý niñänóømäp coogä Diosmädia'agy hajxy miäböcy.

20 Maa ja'a mäyøøjäya'ay tiøjcän, madiu'u texy jii by. Jiibiä orotexy, møødä platatexy, møødä quepychechtiexy, møødä pochtiexy. Tsoobaatpä orotexy møødä platatexy. Cabä quepychechtiexy jiaty tsoobaady møødä pochtiexy.

21 Jaanä jaduñduhmbä, pønjataiä haxøøgwiinmahñdy najtshixøøby, hoy ja'a Diosmädia'agy hajxy jaduñ pianócxät. Hoy hajxy jaduñ quiudiúnät waambaty hajxy yhane'emyii ja'a Wiindsøn Jesucristo. Jaduhñ hajxy quiumayóøjät.

22 Pero miich, mnajtshixó'øwäbä haxøøgwiinmahñdy nebiä muutsc-häna'c-hajxy naxy yhadsoquiän. Ja'a mäbøjpadøjcä Dios hajxy hamuumdu'joot pa'yaaxpä, howyiinmahñdy hajxy miøød. Miäbøjpiä Diosmädia'agy hajxy. Hamiñ haxøpy hajxy ñichocy ñibia'häyoyii. Cab hajxy chiptsocy. Jaduhñ miich hamuumdu'joot mbahíxät.

23 Caj myajtägó'øwät maa häna'cä capxiä mädia'agy hajxy nä'ä nägoobä yajcapxiø'øyän, ja'a ca'a tsoobaatpä, ja'a ca'a tuungpaatpä. Ja'a capxiä mädia'agy jaduñmbä, ja'a tsipä pleetä yhøjx tiecy je'eduhñ, túhmäts.

24 Pønjatý yaa moonsähájtäp ja'a Dios hädaa yaabä naaxwiin, cab hajxy tii yajtsiptá'agät. Ho-

jioot hajxy miøødhádäp hoy ñä'a pøngøxpä. Hoy yajxón hajxy yajnáhixó'øwät. Mee'xtúgäp hajxy jaduhñ. Cab hajxy jiootmä'adät.

²⁵ Mee'xxieemiä miädsip hajxy yhoj miägápxät. Wehñdá Dios jaduhñ miáná'anät coo ja'a miädsipä yhaxøøgcuhdujt hajxy ñajtshixó'øwät, weenä tøyhajt hajxy jaduhñ wyiinjuø'øy.

²⁶ Ween hajxy jaduhñ wyiinmahñmech, hoy hajxy hánajty tøø jia wiinhøøñii ja'a møjcu'ugong. Paadiä møjcu'ugong jaduhñ jia wi'i miäwiinhøøna'añ; ja wi'i miähane'emaamb jaduhñ.

3

¹ Pero huuc wiinjuø'øw miiçh hádaa. Coo hánajty yhabaada'añ coo ja'a Jesucristo yaa quiädaactägatsa'añ hádaa yaabä naaxwiin, mánitá tsø'ty häyohn jiada'añii yhabeta'añii.

² Haxøøgjatiä jäya'ayhajxy hánajty jiatcø'øwa'añ. Jootmøj hajxy hánajty ñibiäda'aga'añii. Jiaançh tehñ yhadsogaambiä xädø'øñ hajxy. Niguiu-mayáañäp hajxy hánajty. Yajcumayaamb hajxy hánajty. Capxtägoyyaamb hajxy hánajty. Cabä tiaj tieedy hajxy hánajty wyiingudsähgø'øwa'añ. Cab hajxy hánajty tii yhojiäwø'øwa'añ. Cabä Diosmädia'agy hajxy hánajty miäbøga'añ.

³ Cabä yhuungä tio'oxy hajxy hánajty choga'añ. Cab hajxy hánajty pøn miee'xa'añ. Mänähøønø'øwaamb hajxy hánajty. Cabä howyiinmahñdy hajxy hánajty miøødhada'añ. Mähäyoowhixaamb hajxy hánajty. Cabä hoybä weenbä hajxy hánajty choga'añ.

4 Tioogaambiä miägu'ughajpä hajxy hänajty. Cab hajxy hänajty hodiägaamby wyiinmahñdyhada'añ tii hajxy hänajty tiunaamby. Yhøxta'awaamby hajxy hänajty neby hajxy xioondá'agät. Cabä Dios hajxy hänajty wyiingudsähgø'øwa'añ.

5 Jaduhñ hajxy hänajty ñibiäda'aga'añii nebiä häna'cä Diosmädia'agy mäbøjpän, pero cab hajxy hänajty tøyhajt miäbøga'añ.

Pønjaty jaduhñ haxøøg jatcøøby, naxy jaduhñ mdehm piuhwá'adsät.

6 Jii cahwiindøyhäna'c-hajxy näje'e, jaançh tehñ yhøhñdaacp hajxy. Naxiä to'oxiøjc hajxy wyiinhøøñ, ja'a hajxy tii ca'a jajp ca'a najuøøbiä. Ja'a to'oxiøjc-hajxy jaduhñbä, cabä howyiinmahñdy hajxy ñä'ägädä møødä. Hamdsoojoot hajxy jaduhñ yajwiinhøøna'añ.

7 Hoy ñä'a mädyii mädia'aguiä hajxy jaduhñ jia wi'i yhabøga'añ, pero cabä tøyhajt hajxy ñä'ägädä wiinjuø'øwa'añ.

8 Ja'a häna'c-hajxy jaduhñ høhñdaacpä, haxøögä wyiinmahñdy hajxy. Cabä Diosmädia'agy hajxy miäbøga'añ. Jaduhñä tøyhajt hajxy miädsibø'øy nebiä Janes ja'a Moisés hajxy jecy miädsibøøyyän møødä Jambres.

9 Cabä Janeshajxy jecy miäjädaacy. Paady hajxy jaduhñ quia'a mäjädaacy coo howyiinmahñdy hajxy hänajty quia'a møødä. Ni häna'c-hajxy jaduhñ quia'a mäjäda'agaambä, ja'a hajxy jäda'ahaty høhñdaacpä.

10 Hoorä, tøøch miich xyhixy coočä tøyhajt nyajñähixø'øy, cooč hoy

njäya'ayhaty. Howyiinmáhñdyhøch nmøød. Nmábójpíøchá Diosmädia'agy hamuumdu'joot. Mee'xxiéemyhøchá jäya'ay nmägäp̄xy. Hoy piøñøch ndsocy nmee'xy. Cábøchá Diosmädia'agy mänaa nnänuuxø'øy.

11 Jaanä jadúhñhøch miích tøø xyhijxpä cooçh hoy miänaajä nmee'xtucy, hoy ñéjpiøch hänäjty nja tsaächpøcy, nébiøch jim̄ tøø njaty tøø nhabetiän Antioquía, møød jim̄ Iconio, møød jim̄ Lистра. Madiú'ujøch jim̄ ndsaaçhpøjcy. Pero cábøchá Dios mänaa xñajtshixø'øy. Hoy miänájøch jaduhñ xcwieendähaty.

12 Haaga jaduhñä jäya'ayhajxy chaächpøgaambä pøn̄jatiä jioot pädaacp maa ja'a Jesucriston coo hajxy jaduhñ hoy jiäya'ayhädät.

13 Pero ja'a cahwiindøybähajxy møødä høhñdaacpähajxy, maas haxøøg hajxy tehñgajnä jiatcø'øwa'añ. Mäwiinhøønaamb hajxy møød hajxy yajwiinhøønaambä.

14 Pero miích, naxiä Diosmädia'agy tehñgajnä mjaac tehñ pianøcxät, ja'a miiçh hamuumdu'joot tøø mmábóquiäbä. Haa ca'a, høøçh miích jaduhñ tøø nyajñähixø'øy, møødä mdaj møødä mdajhoc. Paady miích hoy tøø mhabøcy.

15 Chuucnä miiçhä Diosmädia'agy mdägøøyy capxtaacpä. Jiibiä tøyhajt hajxy nbáatäm neby hajxy hoy nnähwaats nguhwáatsämät. Coo hajxy jaduhñ nmábójcäm ja'a Jesucristocøxpä, jaduhñ hajxy nnähwaats nguhwáatsäm.

16 Ja'a Diosmädia'aguiä, cøxiä Dios jaduhñ yagjahyyä. Jaançh tehñ tiuun̄gpaatpä Diosmädia'agy jaduhñ. Hahixøøby jaduhñ coo ja'a

jäya'ay hajxy nyajnähxixóoyämät. Jaduhñ hajxy nhoj nmägápxämät. Jaduhñ hajxy nyajwiinxiic nyajwiingapxóoyämät coo ja'a tøyhajt hajxy pianócxät, mөөd coo hajxy hoy jiäya'ayhädät.

¹⁷ Pönjatiä Dios tөө yajnähdijy coo ja'a miädia'agy yajwá'xäxät, ween hajxy ca'xy pedyii yhabøcy, jaduhñ hajxy hoy yajtuuñgpáadät hoy ñä'ä maajä.

4

¹ Coo ja'a Jesucristo yaa quiädaactägatsa'añ hädaa yaabä naaxwiin, mänit tiägø'owa'añ mähanembä. Mänitä jäya'ayhajxy nägøxiä yajtøyhajtyega'añii, mөөd hajxy hänajty jujcypiä, mөөd hajxy hänajty tөө yhó'oguiäbä. Ja'a Dioscøxpä mөөdä Jesucristocøxpä, jadúhñhøch miičh nmägapxy nhane'emy

² coo ja'a Diosmädia'agy hoy ñä'ä mänaajä myajwá'xät, mөөd coo ja'a cu'ug myajmäbögät, mөөd coo mhoj mmägápxät, mөөd coo myajwiingapxó'owät coo hajxy jaduhñ miäbögät. Mee'xxieemiä Diosmädia'agy myajnähxixó'owät tehñgajnä.

³⁻⁴ Hix, habáatnäp jaduhñ coo ja'a cu'ugä Diosmädia'agy hajxy quia'a tsogaannä. Cabä tøyhajt hajxy jaduhñ miädowaannä. Hoy ñä'ä mädyii mädia'aguiä hajxy hänajty wyi'i miädowa'añ, nägoo hänajty quia'a tøyä. Mayyä yajnähxixøøbiädøjc hajxy jaduhñ yhøxta'awa'añ, ween hajxy hänajty jaduhñ yajnähxixø'øyii nebiatiä jiiothajxy hänajty chocy.

⁵ Pero miičh, tehñgajnä howyiinmahñdy mmøødhädät. Mmee'xtúgäp jaduhñ coo hänajty mdsaačhpøcy. Myajwá'xäbä Diosmädia'agy.

Hamuumdu'joot mgudiúnät waambatiä Dios tøø xyhane'emy.

⁶ Høøch, ja weenjaty quia'a habaady cooch häna'c xyagho'oga'añ ja'a Jesucristocøxpä. Nähjøjp tu'ujøjphøch hädaajän.

⁷ Tøøchä haxøøgpä njøjtäna'ay. Tøøch nmäjäda'agy. Tøøch hamuumdu'joot ngudiuñ waambátyhøchä Dios tøø xyhane'emy.

⁸ Chámhøch njøbhixy coochä Wiindsón Jesucristo jim xpiäda'aga'añ hawa'adstuum. Mänitøch jim xpiäda'aga'añ coo ja'a jäya'ayhajxy hánajty nägøxiä yajtøyhajtyega'añii. Hoguiuhdujthaamä Jesucristo hajxy jaduhñ xyajtøyhajtyegáanam. Cábøch nidiuhm jim xpiäda'aga'añ hawa'adstuum. Pønjaty jaduhñ jøbhixp hamuumdu'joot coo ja'a Jesucristo yaa quiädaactägatsa'añ hädaa yaabä naaxwiin, nägøxiä hajxy jim piäda'agáanäbä hawa'adstuum.

⁹ Huuc min yaa maaçh høøchän. Mhadø'ødsäp jaduhñ.

¹⁰ Hix, tøøchä häna'c xpiuhwa'açh nämay. Haa ja'a Demas, tøø je'e ñøcxy Tesalónica. Paady yaa tøø choon coo chäna'awa'añ yhäyowa'añ. Haa ja'a Crescente, tøø je'e ñøcxy Galacia. Haa ja'a Tito, tøø je'e ñøcxy Dalmacia.

¹¹ Jagóoyyøchä Lucas yaa xjiaac møødhity. Tunä mayhajt, nøcxä Marcos wowø'øg. Yaa mwoomínät. Hóyhøch yaa xpiuhbédat.

¹² Haa ja'a Tíquico, jimhøch tøø nguexy Efeso.

¹³ Coo miich yaa mmínät, mhuuc túnäbä mayhajt. Høøchä nnähgämëm tu'uuwíjtsäc. Jimhøch tøø nnähgue'egy Troas maa ja'a Carpo tiøjcän.

Møødhøchä nnocy xpíøcmínät møødä animal-hac-hädiúñäbä.

14 Haa ja'a Alejandro, ja'a pujxthädiuumbä, tøøch cøxypänejpý xñähøøñø'øý. Ja'a Dios jaduñ yaghawiimbídäp.

15 Cahwiindøý ja'a Alejandro jaduñ. Mniyajcøpcø'øwøøjäp. Møj may ja'a Alejandro xmiädsiphájtäm coo ja'a Diosmädia'agy hajxy naxy nyajwá'xäm.

16 Mänájøch jayøbajt nyajnäxø'øwø'øýän, cábøch pøñ mäñit xñähgapxtuuty. Nägøxiøchä häna'c xpíuhwaach. Pero cab jaduñ ñejpiä. Weenä Dios jaduñ miee'xy.

17 Mäjähñdiuumhøch hänäjty. Mänítøchä Dios xñäwaañ. Mänítøchä mäjaa xmiooyy, jadúñhøchä jäya'ayä Diosmädia'agy hoy nyajwiingapxøøyy, ja'a hajxy ca'a judíospä, ween hajxy jaduñ nägøxiä miäböcy.

18 Xcwieendähadáambøchä Dios maa ja'a haxøøg ca'a hoybän. Xyajñhwa'ads xyajcuhwa'adsáambøch jaduñ. Jadúñhøch jim xyajnøcxa'añ tsajpootyp maa je'e yhane'emiän. Tsøgå Dios hajxy hoy miänaajä wiingudsähgøøyyäm. Amén.

19 Huuc yajpoo'x ja'a Prisca ja'a høøchcøxpä, møødä Aquila, møødä Onesíforo yhuungä tio'oxy.

20 Haa ja'a Erasto, jim je'e miähmøøyy Corinto. Haa ja'a Trófimo, jimhøch nnähgueecy Mileto. Pójcäp hänäjty je'e.

21 Habáatnäp jaduñ coo tøøchc yhida'añ. Naxy mdehm myínät. Mhadó'ødsäp jaduñ. Nägøxiä miichä mäböjpädøjc yaa xyajpoo'xy møødä Eu-

bulo, møødá Pudente, møødá Lino, møødá Claudia.

²² Ween miichä Wiindsón Jesucristo xmiøødhity. Weenä hoyhajtä weenhajtä xmiø'oy. Amén.

El Nuevo Testamento en mixe de Guichicovi New Testament in Mixe, Isthmus (MX:mir:Mixe, Isthmus)

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Isthmus

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

4e564219-157f-5807-b810-47a15308b8b8